

16. oktober 2018

UKA 2018/189

Uunga siunnersuut: Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allangortinneqarnissaa pillugu Inatsisartut inatsisaat nr. xx, xx.xxx 2018-imeersoq.

(Naalakkersuisut siulittaasuat)

Kalaallit Nunaanni annaassiniarnissamut upalungaarsimaneq aamma ikuallattoornissamik qaartoornissamillu pitsaaliuinermi iliuusissat pillugit Inatsisartut inatsisaata allangortinneqarnissaa pillugu Siumumiit imaattumik oqaaseqaateqassaagut.

Siullermik Upalungaarsimanermit Ataatsimiititaliap arfineq marlunnik ilaasortaartup tunngaviusumik ilaasortaarnikkut katitigaanerata ingerlaannarnissaa Siumumiit inassutigaarput, taamaalilluni oqartussanit siammasissunit peqataaffigineqarnera qulakkeerneqassamat.

Inatsisissami matumani allanguutissatut pingaarnertut oqariartuutigineqarpoq Kalaallit Nunaanni Kommunit Kattuffiata KANUKOKA-p ukioq manna atorunnaarsinneqarnerata kingorna kommunit oqartussani taakkunani sunniuteqarnissaasa qulakkeersimaneqarnissaa. Taamaalilluni Upalungaarsimanermit Ataatsimiititaliami arfineq marlunnik inuttaqartinneqartumi kommuunit aallartitaqarnerat ingerlaannartussanngorlugu aqutissiuunniarneqartoq Siumumiit pitsaasutut isumaqarfigigatsigu matumani oqaatigissavarput.

Kommuunit aallartitaat aalajangersakkat siulii assigalugit Ataatsimiititaliami siulittaasup tulliatut inissisimanissaa Siumumi isumaqatigivarputtaaq.

Taamatuttaaq Upalungaarsimanermit Ataatsimiititaliamut ilaasortanut tamaginnut sinniisussamik toqqaasoqartassasoq, taamaalilluni ilaasortaq ataaseq arlallilluunniit pisinnaajunnaarneranni sulinerup ingerlaannarnissaa tamatumuunakkut qulakkeerniarneqarmat Siumumiit pitsaasutut toqqissisimanartutullu nalilerparput.

Naggataatigut oqartussaaffiit ataasiakkaat inatsisissami oqaasertaasa naleqqussarneqarnissaannut tunngasut Siumumiit maluginiarpagut, taakkualu taaguusersuinernut nutaanut malinnaatinneqarlutik pimmeta Siumumiit isumaqataaffigalugit taamaattariaqarnerannillu naqissuseeqataaffigerusuppavut. Naatsumik taamatut oqaaseqarluta siunnersuut manna ataatsimiititaliamut susassaqartumut aappassaanneernissaa sioqqullugu suliarineqarnissaa Siumumiit inassutigaarput.

Anders Olsen, Siumut.